



錫山遺響序



錫山遺響一編工部主事莫君善誠之所
集也先是邑人翟公厚蓋嘗輯之君謂其
未備也則與潘繼芳再集如左凡若干篇
視翟所輯減十之二增十之四而採選精
矣錫之爲邑在三吳間山水清麗豐曠生

其地者多沈雅秀整以文名家代不乏人
詩文之一也其於人也係才與學而風化
之美惡因之夫豈易哉吾嘗因是而觀乎
其人或以道德或以功名或以氣節或以
隱逸爲品不一而所遇之時或當承平或
及衰末或際草昧或揚于

朝廷或逸于江湖或晦于林壑悲欣感寓
又人人殊然而所作各極其力以上師古
人冲和竒崛激昂含蓄種種皆備蓋一邑
而有天下之觀焉觀乎其槩而詳可知也
嗚呼盛哉古有采詩之官蓋爲風化而設
去古旣遠斯意不存地志所載皆出乎作

者之撰附會假借率無以徵乎其實而茲
集者詩以氏分氏以世序由詞以知其入
而風化亦著是豈非邑之良史哉方今
文教方隆鉅儒長老纂天下通集以贊
皇明之盛必有其人誠使茲集得備採選
則天下之觀於是乎在矣而豈止謂一邑

之典云哉集成君旣自序之後謂予當有
言予不佞於是乎書

正德庚午季冬朔嘉議大夫都察院右副
都御史奉

勅巡撫貴州地方兼理軍務前總督漕運
邑人邵寶序



錫山遺響詩卷之一

湛長史

名挺字茂之南朝宋人南平王鐔司徒右

南平王過歷山草堂應教

閉戶守玄漠無復車馬跡
衰廢歸丘樊歲寒見松柏
身慚睢陽老名忝梁園客
習隱非市朝追賞在山澤
離離插天樹磊磊間雲石
持此怡一生傷哉駒度隙

附南平王題湛長史歷山草堂詩

茲嶽蘊靈詭馮覽趣亦瞻
九峰相接連五渚逆縈浸
層阿疲且引絕岩暢方禁
泉溜夏更寒林交晝常蔭
伊余久滯涅復得味恬悛
願遂安期生於焉愜高枕

李文肅

名紳字公垂唐元和進士仕至左僕射封趙郡公謚文肅詳見唐史

過梅李上家山

上家山家山依舊好昔時松桂長今來容髮老家山
臨古道高低入雲樹蕪沒連天草草色日淒淒寒蟬
徧草啼噪鴉投樹遠行鴈貼雲飛岩光翻落日僧火
開經室竹洞磬聲長松樓鐘韻疾苔塔滴溜缺石甃
鋪莎密舊經行處迷前交坐中失歎息整華冠持杯
彊自歡笑歌憐稚孺絲竹縱吹彈山明溪月上酒滿
心聊放巾髮此淹留垂絲匪閑曠青山不可上昔士
還情愴况復白頭人追懷空望望

別泉石

晴沙見底空無色青石潛流暗有聲微動竹風涵淅
瀝細浮松月透輕盈桂凝秋露添靈液茗折春芽泥
玉英應是梵居連洞府浴池今化醴泉清

鑑玄影堂

香燈寂寞網塵中煩惱身銷色界空龍鉢已傾無法
雨虎牀猶在有悲風定心池上雙漚沒投手岩邊夢
幻通深夜月明松子落儼然聽石待生公

憶惠山

故山一別光陰改秋露殘蟬歲月多松下壯心年少

去池邊衰影老人過白雲生滅依岩谷青桂榮枯託
薜蘿惟有此身長是客亦驅旌旆寄煙波

芙蓉湖

丹樹村邊煙火微碧波深處鴈紛飛蕭條落葉垂楊
岸隔水寥寥聞擣衣

水寬山遠煙嵐迥柳岸縈迴在碧流清晝不風鳧鴈
少卻疑初夢鏡湖秋

逐波雲采參差遠背日嵐光隱見深猶似望中連海
樹月生湖上是山陰

重到惠山

望中白鶴憐歸翼行處青苔恨昔遊還向竹窻名姓
下數行添記別離愁

碧峰依舊松筠老重得經過已白頭俱是海天黃葉
信兩逢霜節菊花秋

守滁陽深秋憶登郡城望琅琊

山城小閣臨青嶂紅樹蓮宮接薜蘿斜日半岩開古
殿野煙浮水掩輕波菊迎秋節西風急鴈引砧聲北
思多深夜獨吟還不寐坐看凝露滿庭莎

滁陽春日懷果園閒宴

西園到日栽桃李紅白枝低拂酒杯繁艷只愁風處

落醉筵多就月中開勸人莫折憐芳早把燭頻看畏
曉催聞道數年深草露幾株獨得傍池臺

七年初到洛陽寓居宣教里時已春暮而四老
俱在洛中分司

青莎滿地無三徑白髮緣頭忝四人官職謬齊商嶺
客姓名那重漢廷臣聖朝寡罪容衰齒愚叟多慙未
退身惟有門人憐鈍拙勸教沉醉洛陽春

初秋忽奉詔除浙東觀察使檢校

龍樓寄引簪裾客鳳闕陪趨朔望朝疎受杜門期脫
屣買臣歸邸忽乘輶印封龜紐知頒爵冠飾蟬綬更

珥貂飛詔寵榮歡里舍豈徒斑白與垂髫

憶過潤州

昔年從宦干戈地黃綬青春一魯儒弓犯控弦招武
旅劔當抽匣問狂夫帛書投筆封魚腹玄髮衝冠捋
虎鬚談笑謝金何所媿不爲偷賣用兵符

禹廟

削平水土竊滄海畚鍤東南盡會稽山擁翠屏朝玉
帛穴通金闕架雲霓祕文鏤石藏青壁寶檢封雲化
紫泥清廟萬年長血食始知明德與天齊

臯橋

伯鸞憔悴甘飄寓非向囂塵隱姓名鴻鵠羽毛終有志素絲琴瑟自諧聲故橋秋月無家照舊井寒泉見底清猶有餘風未磨滅至今鄉里重和鳴

湛江陰

名賁字進士江陰主簿

唐人茂之十三世孫

問

伏覽呂侍郎立員外舊題十三代祖歷山草堂

詩因書記事

名遂貴知己道勝方晦迹高居葺蓮宮遺文煥石壁桑田代已變池草春猶碧識曲遇周郎知音荷宗伯調逸南平兆風清建安跡祖德令發揚還同書史冊

題歷山司徒右長史祖宅

隳官長史籍高步歷山椒麗句傳黃絹香名播宋朝分能知止足跡貴出塵囂松竹心長固池臺興自饒龍宮欣訪舊鶯谷忝遷喬從事叨承乏銅章愧在腰

李中丞

名隲字史中丞上柱

國賜紫金魚袋

唐人自潯陽居惠山仕至御

惠山寺肄業送僧懷坦上人

流水何山分浮雲空中遇我生無根株聚散亦難固憶昨鬪龍春岩棲侶高步清懷去羈束幽境無滓汚日落九峰明煙生萬華暮茲歡未云隔前笑倏已故四時難信留百草換霜露離襟一成解帳抱將何諭驚泉有餘哀永日誰與度緬思孤帆影再往重江路

去去忽悽悲因風暫回顧

晨過昌師院

深庭芳草濃曉井山泉溢林馥亂沉煙石潤侵經室
幽巖鳥飛靜晴嶺雲歸密壁蘚凝蒼華竹陰漏晴日
生期半宵夢憂緒仍非一若無高世心安能此終畢
自惠山至吳下寄酌南徐從事

不接芳晨遊獨此長洲苑風顏一成阻翰墨勞空返
悠悠汀渚長杳杳蘋華晚如何西府歡尚念東吳遠
瑤音動清韻蘭思芬盈碗猶及九峰春歸吟白雲巘
讀惠山若水師詩集因題故院三首

五天何處望心念豈皆知化塔留今日鳴泉自昔時
古苔生石靜秋草滿山悲莫道聲容遠長歌白雪詞
高懷逢異境佳句想吟頻月冷松溪夜煙濃草寺春
浮雲將世遠清聽與名新不見開巖日空爲拜影人
景物搜求歇山雲放縱飛樹寒煙鶴去池靜水龍歸
暗榻塵飄滿陰簷月到稀何年燈燄盡風動影堂扉
若水 唐僧居惠山普利院事見錫山志

題惠山泉

石脉綻寒光松根噴曉涼注瓶雲母滑漱齒茯苓香
野客偷煎茗山僧惜淨牀安禪何所問孤月在中央

空嘆與齡夢俄聞曳杖歌平生濟川意無處問施羅
寄長沙簿孫明遠

陽城衰晚拙催科闔室空慙罪已多祭竈請鄰君自
適載醪祛惑我誰過猗猗庭樹蘭堪佩寂寂門無雀
可羅歸去行尋溪上侶為投纓綬換漁簑

袁博士

名點字思正號潔齋宋嘉祐八年進士為
司農簿獻無逸傳神宗召對遷太學博士
終湖北判官嘗與謝上蔡解辨論語三第
點植正功皆有名當世

題惠山寺

山翁自合老林高小有天中盡杳冥兩面樓臺驅作
勢半崖松石倚為屏雲歸洞口紛紛見泉落池心細

細聽勝景深藏誰到此好須圖繪入丹青

石女塚

君不見見湘江不流湘水清悲風愁雨能無情靈妃寶
瑟聲未絕九疑雲鎖蒼梧深又不見霸陵路入新豐
道顧念邯鄲意悽愴夫人鼓瑟君為歌此山為擲吾
將老古來死者不勝計歷歷道邊猶可記人言梁女
好鼓瑟琴心未許人知意高山流水聲已虛想像當
時足幽思九原可作誰與歸秋風蕭蕭草淒淒丘墟
之下多狐狸

次韻蔣不回惠山行見贈

九龍山高茂松竹冉冉嵐光真潑綠重岡復嶺勢崢
嶸五里垂楊排岸曲雲生洞口若拖縑泉落田間如
噴玉公垂若水遺迹在瀟洒儒冠與胡服夜蟾清影
照寒流春鳥新聲答寒谷山畔人家農事閑長得秋
風魚稻熟太湖光射夕陽間澗澤相通財必育一生
遊賞心不足憶與高人時往復夢魂還是念歸歟問
舍求田無百斛身名牽制悼人心收拾未能如水覆
侵尋白髮已盈簪方此徘徊干寸祿樂安道人來自
蜀尚爾小官身僕僕惠然相訪蓋初傾符彩瑩顏神
滿目徐言得道先辟穀二年粒米不入腹日南先之

韻超俗授術為之留五宿發殺天機指下傳妙用圓
通皆智燭見我情親逾族屬勸以脩持言滿軸自慚
正類鷄伏鵠敢示精心循所祝痊除多謝枕中方臭
腐豈為刀下肉斧斤牛羊肆殘毒古人已况牛山木
深言元氣須引續起我衰羸九射鹿煩曾一訣願相
傳卦體儼然存九六

袁司諫

名植字材老宋崇寧三年進士為監察御史陳邊防十三事建炎初擢左司諫行宰

臣諱守岳州會李九文叛見害于武昌後

贈直龍圖閣錄其後二人第名點字思與

宋元豐八年進士熙寧初任太學直講詩
甚工東坡見之有驚心駭目之嘆借其詩
不傳尚
伺采補

題惠山諫師竹月軒

子猷喜種竹太白喜乘月
俛仰雲泥間勝事俱清絕
况乃吾廬幽風煙浩一丘
竹虛能受月華白月白能
牽竹翠浮不應玉壘李太白
長對山陰王子猷未携
花下一壺酒已登殘夜水
明樓人間好景四拜難無
如月下春琅玕影搖金瑣
碎光動劔芒寒
寤醒耿不寐哦詩坐長歎

題惠山次韻蔣叔任觀溪漲

煙芟平川上雲屯翠嶺頭
雨淫成大浸堤潰失安流
地入三吳窄山餘九隴浮
不應昏墊後始用濟川舟

翁狀元

名挺字士特自建安居邑之膠山宋崇寧間進士

晚坐碧雲塢二首塢在膠山

夕陽黯將沉缺月遲未吐
滿眼玻璃堆翻疑夢中觀
玉樹秋益明驪珠夜方吐
繞檻碧雲收塵跡故難覩

尤文簡

名表字延之號遂初宋紹興間進士仕至禮部尚書贈太師謚文簡從諭玉泉學得龜山之傳所著有遂初小藁等書

遊青山寺

崢嶸樓閣插天開門外湖山翠
作堆蕩漾煙波迷澤國空濛雲氣
認蓬萊香銷龍象輝金碧雨過麒麟
駁翠苔二十九年三到此一生知有幾
回來

次韻德翁苦雨

十年江國水如淫，怕見三秋雨作霖。
可念田家妨卒歲，須煩風伯蕩層陰。
禾頭昨夜憂生耳，木德何時卻守心。
兀坐書牕詩作祟，寒蟲嗚咽伴愁吟。

劉屯田墓壯節亭

西澗當年卜考槃，便於神武掛衣冠。
後生無復知前輩，故老猶能說長官。
三尺荒墳埋玉冷，百年壯節倚天寒。
表章賴有群賢力，誰把生芻奠酒盤。

送朱晦庵南歸

二年摩手撫瘡痍，恩與廬山五老齊。
合侍玉皇香案

側卻持華節，大江西鼎新。
白鹿諸生學築就，長虹萬丈堤。
待哺饑民，偏戀德老翁。
猶作小兒啼。

送吳待制帥襄陽二首

方持紫橐侍西清，忽領雄藩向暑行。
誰謂風流貴公子，甘爲辛苦一書生。
詞源筆下三千牘，武庫胸中十萬兵。
從此君王寬北顧，山南東道得長城。
欲將盤錯試餘鋒，故擁旗麾訖外庸。
南峴北津形勝地，前羊後杜昔賢蹤。
不妨劉載同民樂，自有輕裘折虜衝。
努力功名歸報國，莫思山月與林鍾。

梅花

冷艷天然白寒香分外清
稍驚春色早又喚客愁生
待索巡簷笑嫌聞出塞聲
園林多少樹見爾眼偏明

蠟梅

破臘驚春意凌寒試曉粧
應嫌脂粉白故染麴塵黃
綴樹蜂懸室排筍鴈着行
團酥與凝蠟難學是生香

梅花

竹外籬邊一樹斜
可憐芳意自萌芽也知春到先舒
蕊又被寒欺不放花
索笑幾回驚歲晚相思一夜繞
天涯直須待得重垂發
踏月相携過酒家

冷蕊疎枝半不禁
眼看芳信日駸駸
雪霜不管朝天
面風月能知匪石
心望遠可無南北
使客愁空費短
長吟年年準擬花
排恨不道看花恨更深

落梅

清溪西畔小橋東
落月紛紛水映紅
五夜客愁花片
裏一年春事角聲中
歌殘玉樹人何在
舞破山香曲
未終卻憶孤山醉
歸路馬蹄香雪襯東風

正月二十八日夜大雪

一冬無雪潤田疇
渴井泉源凍不流
昨夜忽飛三尺
雪今年須兆十分秋
占時父老應先喜
忍凍饑民莫
漫愁晴色已回春
氣候晚風搖綠看來年

別李德翁

長恨古人少斯人今古人二難俱益友兩載覺情親
世態深難測心期久益真相看俱半百此別倍酸辛
送趙成都二首

蜀道當謀帥維城孰愈公夷陵護江左斜谷顧關中
北虜心豺虎南蠻執蟻蠹守攻雖有異鎮撫不妨同
不但元戎貴仍兼制使雄深沉天與度簡敬學成功
人士薰陶內兵民教訓中祇應先卻穀寧復後文翁

李肅簡

名祥字元德號小山宋隆興初進士官至
國子祭酒學于尤文簡得龜山之傳韓侂
胄貶逐趙忠定朱文公無敢言者公上疏
爭之去官後除直龍圖閣謚肅簡有文集

和夜雨

藏于
學宮

雲冷銀蟾遯香寒寶篆遲輕雷新破夢好雨故知時
池存陰抽帶山芽暗展旗空堦聞夜響楚客起題詩

高宗皇帝挽詞二首

亦伏恢炎緒珍符屬紹興武功歸藝祖仁治法昭陵
弓墜龍髯斷雲蟠鶴馭昇巍巍名不有清廟若為稱
七月來同軌因山儉德昭堯喪三載慕禹葬百神朝
寂寞龍樓闕淒涼鳳輦遙萬人紛雨泣血灑浙江潮
孝宗皇帝挽詞二首

上曆軒皇鳳初潛建邸龍系隆光藝祖付託大高宗
幸學重鳴蹕明禮九奠琮未酬恢復志遺恨隘疆封
授受唐虞盛羹墻極繼承誠心惟業業子道每丞丞
寰海雙親養通喪上聖能獨高惟孝德萬古仰徽稱

挽韓尚書

社稷元勳絕代無夙瞻先德在龜趺風雲感遇依鱗
翼鸞鵠棲停映竹梧偃武承平開聖治投戈委質尚
文儒紫荷舊向芳年折遺恨猶稽到六符

挽郭知府

平生孤苦范希文蓋世功名自立身要識鄉閭稱孝

子定知宗社作忠臣一麾未足搏雲翼五鼎猶懷
棘薪悵望新阡無路到他年宿草亦沾巾

和梅二絕句

漸褪紅包更洗粧多情淡月久回皇極憐玉骨生來
瘦占得東風第一芳

曉山明滅小溪春點點高標竄出塵繫馬不來憑莫
訝攀條嚼蕊我何人

蔣文忠

名重珍字良貴號實齋又號一梅老人從
尤文簡學得龜山之傳了翁真德秀
講明正學宋嘉定間魁天下上七箴三疏
忤史適遠去官累召不就仕終刑部侍郎
忠謚文

題惠山

龍山惠山兩山雲出能為雨入為晴雲山之氣有歛
散歛散之理斯為神我廬山下有小隱雲為動兮山
為靜悠然而出物之澤屹然而峙地之鎮我見雲山
喜與俱雲山無情不見余我比雲山多此見不如一
似雲山無

楊彥昭

名文炳字彥昭
居邑之鴻山

遊惠山

騎馬西神訪遠公湛君舊宅且從容樓臺影落雙河
口鐘磬聲傳九隴峰自汲清泉煎苦茗又携美酒看

眠松若水禪洞寒流靜應是當年養毒龍

錫山遺響詩卷之一

錫山遺響詩卷之二

陳肖梅

名焯字光伯宋德祐間常州府通判城陷死之贈寶章閣學士嘗從一梅蔣文忠學

題無錫北郭外前湯普濟庵

一尖龍舌地蘭若此中開曲徑深依竹荒池淺鑿苔
要令溪水接莫碍野雲來只恐菴居興難淹出世材

壽賈平章母夫人

槐府近紅雲萱堂度好春歡謔藹旁午新曆慶逢辛
演卦餘重八循環越再旬寒芒駐南極至妙侶西真
菊水清高派桃溪窈窕鄰人間見仙佛天上麗星辰

此日胚元化當季喏百神起家禕翟品瑞世棟梁臣
出手立人極分身清虜塵笑看闢鴟閣立見上龍津
成性參騫至躋時堯舜淳頌符宜有國錫類仰茲辰
加禮嚴三殿瞻儀肅衆賓稱賢名可大曰壽命重申
溫清時閒燕曾玄競抱麟群生沾厚福九袞起今辰
美邁齊賢母榮逾趙縶親宮輿朝穩步天饌日嘗珍
靜足參攸久尊寧計等倫葛洪丹井畔坡老綠湖濱
蓬閣非常境義和緩兩輪萬方長送喜膝下轉洪鈞

虞薇山

名薦發字均瑞號薇山老人宋咸淳間進士仕至寧國縣令後聞論工部尤文簡李肅簡蔣文忠諸賢相傳龜山之學自丹陽居無錫久之舉為庠師與赴學校學者宗

之稱薇山先生

憶梅

不見疎花久悽然恨滿襟相逢當歲晚一別又春深
冷落山中約淒涼月下心期君須待雪把酒候前林
進士錫宴謝宰相咸淳丁卯登第後作
貢鄉曾是鹿鳴賓湛露光中拜賜新要使書生酌素
志幸逢賢相轉洪鈞頒來御酒勤中使藏去宮花說
里人被此恩榮無以報明時擇士屬元臣

春夢

午倦尋芳借枕敵翛然一榻與僧依化為蝴蝶不知

遠任逐楊花到處飛

贈醫齒者

海上仙方篋裏多江南絕技是君家
祇緣醫得談天口從此高名掛齒牙

揀花風

細紅如雪曉吹殘一樹茸茸不耐看
二十四番惟此晚熟梅時節尚留寒

范提舉

名字景文號為莊宋德祐初為太學生
與同舍葉李輩上書攻賈似道貶瓊州元
遷居無錫

燕山聞鶉

燕山三月初三夜聽得啼鶉第一聲
同是小樓孤燭下主人睡熟客心驚

被檄漳南宿荆溪李家

王程那可緩吟送夕陽西暫泊孤舟處
忽聞幽鳥啼青浮山遠近翠合樹高低
不敢臨流照塵容愧此溪

酒邊和葉亦愚提舉

亦愚名李

坐來談笑發天真安得長令酒入唇
俗物但知錢使鬼書生能遣筆通神
半牕風月聊供醉四壁琴書不似貧
八百斛椒機未息夢中猶自兩眉顰

和姜中丞遊金山

兩岸飛塵十丈深誰來此地一開襟渡江人指如浮
王建寺僧言舊得金白日懸空天不夜黑風吹浪晝
長陰妙高臺上無窮意惟有青山古到今

和張西岩御史

休論海角與天涯楊柳橋邊有幾家極目煙波三十
里如今一半是荷花

兩後西風意自如入山所得勝熊魚脩廊西畔豐碑
在秦觀文章米芾書

悼亡三首

蒼天不解管人愁眼縱成枯淚亦流前有無窮後無

盡他生未卜此生休

白頭偕老誓相期豈料中年求別離從此人間不如

夢夢中笑語似平時

漁浦寒潮渡雪舟廬山晚翠照江樓祗今暇日一杯

酒誰與相陪說舊遊

陸待制

名士弘字以道元
進士仕至翰林待制

挽華季充

早慧推文舉多才許正平詩聲隨日長病骨與秋清
桃葉歌先斷蘭芽玉未成燈前看麈尾應自惜餘生

題鄒氏壽山圖

野水微茫小苑東
林居窈窕白雲中
一簾濕翠山川氣
十里生香草木風
落日放舟還載酒
有時揮麈坐談空
惟應安晚堂前月
長照梅邊鶴髮翁

陳脩撰

名顯曾字景忠號昭先肖梅先生曾孫史逸肖梅死事顯曾上書得贈官立傳仕至翰林修撰事見昭先堂稿

溪山勝槩樓為華子英作

江南二月羅衣裳
藤花滿地山雲香
背人小燕撇波去
朱簾白日遊絲長
蒲茸綠淺芹芽紫
沙上輕煙濕飛雨
美人遙睇木蘭船
一夜相思隔春水

送張思齊從事吳郡分韻得彦字

涼風下清川
夕雲起芳甸
山蜩流細響
林阿鬱蔥蒨
雄藩控江海
翹楚集群彥
賓幙振華纓
公堂接清讌
驅車往城門
徂暑物候變
以茲離別難
詎惜捐勤薦

題南臺中丞趙彥祥西溪亭

涪水日東注
中江復南趨
高亭據其匯
矚曠情始愉
嵌空繁木張
秀階輕萋敷
春嚶聚翺白
畫永來輕鳧
耕菑藝稷黍
飯客苴筍莆
高居樂幽屏
治世資謀謨
撫士起霄漢
遐征戒車徒
問俗行使節
分垣佐鈞樞
位躋中執法
化洽鹽海隅
報國心有在
歸田志無渝
願遲晝錦念
稍待疲氓蘇

題大名韓起宗秋野堂

遠宦酬夙志，空懷舊居迢迢。大河北，洛上有田廬。
桑林蔚春藝，黍稷蕃歲儲。前軒憺秋辰，零露委林墟。
涼風吹翔隼，清川上游魚。釀酒桑落後，授衣鳴鴈初。
及同遂初賦，不改絕交書。

卧病奉懷中愷季子脩齡三君子

地偏異寒燠，厲風筋骨傷。時艱况羈旅，年登尚糟糠。
憶昨盛壯辰，致身思慨慷。空餘獻納志，白首念巖廊。
卧疾厭長夜，驚鳥慘繁霜。斗室悲黜闇，攬衣俟初陽。

送真尚書

玄樞幹流火，素節澹涼秋。朝陰翳微薄，夕照下崇丘。
苑結不自怡，臨川送華輶。從軍二十載，幙下著良籌。
詎甘枳棘棲，寧與寒餓飢。衰蟬憇黃葉，節序嘆悠悠。
候蟲躍青蘋，嘍嘍機杼謀。人生亦多艱，况乃離別憂。
期君慎素履，勳業垂令猷。

和張可道御史中秋無月韻

螟螣南飛正滿田，河流東潰欲稽天。殘雲不解成甘澍，卻向中秋妬月圓。

寄王師魯尚書

東闕微風動翠旂，內園深樹接彤庭。春壺注酒穿花

送書漏傳籤隔戶聽定有仙槎上河漢絕知蓬島限
滄溟承聞奉詔脩三史制作應看似六經

寄危太樸檢討

聞說抽毫在石渠從容勸講盡文儒掄才已著金閨
籍上直仍分玉篆符官酒向春浮綠蟻苑花迎日上
紅旂石城舊憶佳遊共江浦吟余短檝孤

送董仲玉

展席深壺注濁醪渡江華槩盪輕濤秋歸海激丹楓
靜天入淮壖白鴈高壁月瓊枝春後看畫欄紅藥醉
時邀官行日日題詩寄應比何郎作掾曹

歌風臺次韻

建議初辭灞上亭指揮豪傑破名城高臺置酒傳天
語故國蒙恩罷歲征王氣鬱葱關樹曉霸圖蕭瑟楚
雲晴良弓走狗知何補空嘆韓彭意未平

題金壇張氏雲泉齋

爾家南山不計年松下小齋長獨眠閒雲棲戶墮復
起迴溜入溪清可沿山頭抱犢夕易下池上種花春
雨前媿伐始衰仍遠役束書西問漢江船

孟松江

名潼字宗鎮本山東人宋信安郡王忠厚
五世孫至元間以茂異舉為文學掾累遷
松江府通判因信安
墓在惠山遂家焉

挽虞薇山先生

桑梓連雲影樞趨愧互鄉道同志易合情
淡分俱忘舊夢空流水高風企惠陽
凝雲淒薤露回首淚沾裳

徐侍郎

名憲字元度元人精于理學仕至戶部侍郎

送奉化州判薛仲傑

酒闌初上甬東船春入乾坤已晏然
石首迎潮喧海市麥苗帶雨暗畬田
捲簾晴看扶桑日退食時分雪竇泉
引領未為千里隔政成須使萬人傳

倪雲林

名瓚字元鎮號雲林子性清簡讀書博雅善畫山水木石元季不仕所著有雲林集

壽尚左鄭先生

晞髮迎出日被禊臨平津芙蓉渾彩靜
嘉樹繁陰新掬溜洗窪石呼童烹澗芹
未言酌春酒樂茲初度辰

懷袁子方彈琴

蕙帳疑夕清高堂流月明芳琴發綺席
列坐散煩纓迴翔別鶴意縹緲孤鸞鳴
一寫冰霜操掩抑寄餘情

贈王光大

春服始輕體嘉樹欲垂陰夫椒結秀色
江流涵碧深晴絲正高下好鳥亦嚶吟
豈無伐木詩怡此風雩心蕭間道館聽
袁南宮彈琴是日風雨蕭然有感而作

玉琴轉清亮風雨更飄飄
疎桐蔭高館朱槿耀芳條
生物曷可遏撫事發長謠
弱齡陪清讌循髮想垂髫
相見日以老離居夢且遙
秋江眇雲水去鶴影搖

林下遣興

眼見藤梢已過牆手拈書卷復堆牀
閒臨水檻親魚鳥欲出柴門畏虎狼
冠製不嫌龜殼小衣裾新剪鶴翎長
從來任拙惟疎懶一月秋陰不下堂

奉懷張外史

陰壑慄綠苔生碧雲亭多遠情
松杉鶴去轉蕭瑟洲渚花落自縱橫
從君下榻往中目看我鼓柁出

層城洞口菌巢無恙否定應閉閣著書成
不但入城踪跡少南鄰野老見猶稀
狂歌鳴鳳聊自慰舊學屠龍良已非
蒼蘚渾封麋鹿逕白雲新補薜蘿衣
楊雄筆劄誰能繼欲讀靈文一扣扉

寄陸靜遠

積雨空林生薜蘿墨池新漲浴群鵝
每懷笠澤從漁釣更擬滄浪聽棹歌
荷葉滿湖雲掩冉橘花垂戶雪婆娑
布帆十幅秋風裏卽買吳船載酒過

岳王墓

奸任忠誅轉繆悠鄂王功業浩難收
出師未久班師

急相國翻為敵國謀廢壘河山猶帶憤悲風蘭蕙總
驚秋異代行人一洒淚荒墳落日重回頭

絕句

醉喚吳姬舞蹈筵風欄花陣亦回旋愁生細雨零烟
外詩在青蘋白鳥邊

對雨遣懷

數日枇杷花落盡可憐春事到櫻桃聽風聽雨眠三
日排遣新愁付濁醪

竹枝詞

錢王墓田松柏稀岳王祠堂在湖西西泠橋邊草春

綠飛來峰頭烏夜啼

湖邊女兒紅粉粧不學羅敷春采桑學成飛燕春風

舞嫁與燕山遊冶郎

二月江水青接天楊柳隔江搖綠煙一夜愁心似春

雪隨風舞影落君前

畫梧竹草亭寄潘仁仲

翠竹蕭蕭二倚碧梧一亭聊以賦閒居浮杯樂飲思潘

岳藻思春江濯錦如

陳海鹽

名方字子貞號谷陽本潤州人知海鹽州
寓無錫三十年終所著有錫谷詩錄

送薛仲傑之官建德七十二韻

昔我仁皇臣萬方草木培作棟楠樟書聲琅琅出要
荒探賸聖奧窺微茫三尺童子走踉蹌譚說性命揮
鋒鏑上師洙泗黜管商奴僕五伯尊三王犧尊雕刻
塗青黃剔抉陳腐鉏尋常公孫董晁司馬揚稱子大
夫奉清光鏗鏘衝牙雜珩璜五色藻藉壁以璋姓名
再拜天府藏大可為柱小則梁黼黻黜結躋康莊四
海衣被皆文章丕哉聖謨何洋洋仁義涵濡億載長
劉李不敢為鴈行人臯戶契時虞唐十年變魯機始
張海若焉可持蠡量有握朝柄獬犬狂妄干天紀紊
天綱六經高閣黯不彰如瞽無相行佞天子震怒

投豺狼快噬腰膂屠腎腸天子曰俞宰相良再徵王
度中書堂榜以左右開文場一經不讓左榜強較之
舊制誰能當河東之英孤鳳凰雲錦羽衣金玉相願
出鼓舞為禎祥舉筆壯士操長鎗揮霍振掉森回翔
腕髀肯綮俱在旁一一解析手不創變化慘淡雲低
昂天地欻忽高騰驤看花馬鞚青絲韁稱情袍着緋
羅香膏沐聖德波湛汪小臣如芥何以償塵糜為飯
水為漿龔黃邵杜臣所望民有疾苦臣必攘俾饑有
食寒有裳婦女樂歲農夫康斯文行世日更昌文星
炯天中央儉臣窗前舊書囊拜頌聖德垂無疆嚴

陵厥土惟燥剛雲山蒼二水決三聞子往矣趣治裝
子來徵詩予慨慷歌聲激烈聽必詳毋恠潦倒逾披
摺稽首聖德不可忘浙江蕭八八月涼江平如鏡一
葦航風吹越樹綠可將雨亂江蘋青更芳嗟予僻陋
徒悲傷不得與子共一觴一觴於子豈足相頡頏稽
首聖德不可忘

徐元度所藏故呂殿帥玉鷹巾環歌

故人示我白玉環二十五珠光夜寒環中角鷹帶條
鏃側立架上迴高翰雄姿欲動毛骨緊捎風勢與秋
雲盡未應身軀大踰寸已覺鳥獸神凋隕故人指點

再三述共說前朝呂家物呂家門軍十萬卒鐵馬突

八城窟頭上兜鍪生蟻蝨吁此環同白骨朝家

好將軍綸巾白錦袖帳前猛士帶得勝將

此環無與並黃塵一角弓勁北馬驍騰邊草盛

軍慷慨髀肉多夜半激烈生悲歌迴首襄陽跡如

吁嗟此環其奈何

陪周隱君謁李忠定公祠

丞相下腐儒慷慨這國難平生痛哭心忍死抱長筭
嗚呼百茂後寂寞誰享裸土今空山中祠宇安涯岸
鳥跡上香臺棲鹿浴風慢山僧雖異流展像亟稱讚

飄風塵際黃屋在鼠竄不有左轄尊至今猶扼腕
公以人心安公去人心亂垣種將軍一鼓銳而悍
所至勢項小衄何足憚魏公濟世才安劉左吾袒
傾蓋出涕中情倉皇青城役慘澹失神觀
豈無婁敬策尚足勤脩捍落付空言悠惜神斷
聲名字宙間草入嗟歎當其瀝膽秋群敵背不汗
感春寄杞菊齋

青春漠又迢多為江城破寂寥二月光陰紅杏
樹一天風雨赤欄橋心方似水終須定鬢已如霜竟
不消舊日成行成杞菊近來誰愛最長條

題冶亭

鬱鬱長松滴露梢先皇於此駐旌旄丹楹上下風雲
近黼宸中間日月高真士啓函瞻彩軸小民掩袂憶
烏號千秋萬歲尊南紀泰華何能比一毫

遊惠山

僧居高處接雲霞村市周遭石徑斜細山泉爭入
澗雙水鳥淨眠沙佛前風動杪樞樹溪上春留躑
躑花十五年來頭漸白倚欄仍舊一烏紗

周贛齋

名翼字子羽號贛齋元
季不仕所著有贛齋集

懷故友華懋卿

我昔從君骨肉同十年裘馬踏春紅俄為地下脩文
主不作人間折臂公南園看花思酒伴西窗留客話
詩窮重來門巷無人識慟哭西風白髮翁

題華季充剪韭軒

吳下有田宜種韭高風莫笑庾郎貧
暈飛畫棟青林表玉洗行盤綠水濱
夜雨剪來茸自長春風吹起綠初勻
客來一筋分清供不與區區肉食人

題惠山寺次同遊潘傅之韻

路出城西紫陌頭旌忠寺裏作春遊
杪櫂葉暗雲初起躑躅花開雨未收
古殿龍蛇唐制度東山歌舞晉

風流野人不慣乘車馬也向溪邊具小舟

鴈來紅

朔馬南來塞草秋未霜紅葉已先抽
綠珠宴罷歸金屋七尺珊瑚夜不收

周此山名權字衡之號此山

惠山寺酌泉

惠山鬱律九龍峯磅礴大地包鴻濛
劃然一夕震風雨欲啓靈境昭神功
六丁行空怒鞭斥電火搖光飛霹靂
一聲推裂老雲根嵌洞中開迸寒液
道人斲玉深護藏鏡涵萬古疑秋光
陸羽甄品親試嘗翠浪者

出松風香我來山下討幽境自挈瓶罌汲清冷味如
甘雪凍齒牙紺碧光中敲鳳餅昏塵滌淨清淨觀心
源點透詩中禪亟呼陶泓挾玄玉揮灑字二泉聲寒
投閒半日聊此駐孤棹明朝又東去紅塵人世幾浮
雲鐘鼓空山自朝暮

王臨江

名寔字安節元至正間仕至臨江同知

寄倪元鎮

每懷雲林人能詩復能畫詩摩靖節壘画並董元駕
大娘舞劍器烈士歌唾壺前朝媚沒骨尤矣斯人徒

吳都事

名采字廷章仕至浙東行都事

越中秋懷二首

無邊落木送秋來宋玉愁多賦更哀淮甸烽煙連白
下楚江雲影暗陽臺漢王未惜三齊印龐統元非百
里才俛仰去天纔咫尺幾回清夢到三台
羈思愁懷耿未平秋來景物倍傷情蒼鯨拔浪風偏
惡寶劍驚時夜亦鳴南國未全滄海貢中原猶望朔
方兵躬耕自昔英雄事未必南陽老此生

陳左丞

名肅字伯將肖梅先生族孫元至正任兵部尚書河南行省左丞没于王事

弔鄒忠公墓

鳳凰戾朝陽和鳴太平瑞百鳥從喧啾歲蕤赤霄逝

昔者鄒忠公天質蘊純粹茗華玉樹春秀映層城麗
融貫河南學會要慎獨際出身職俎豆淮潁風流思
臧否謚法解審諤補衮議君王正年少思愛競陳衛
長門生秋草寂寞金屋閉時聞昭陽間車音雜歌吹
朝方降鴻冊莫已奏封事宛轉陳正始社稷宗廟計
權臣肆讒毒抵罪竄荒裔蘆簫送銅鼓笑語見魑魅
秦陵嘶石馬明堂更寶位徘徊趨魏闕感激俯宸陛
至尊重嘆獎再俾司獻替簡嚴起居作弘雅絲綸製
戎曹羽書靜銓部環林萃蹇我蓬萊閣日月近清秘
一麾出江左慷慨懷古意長嘯新亭賞爽挹龍虎氣

菱香藕花靜畫舫西湖艤遂為禹穴游復上越臺
安知鄉焚橐茲乃致姦偽湘流湛凝碧衡嶽鬱翠
豈無鄙酒美憂國不成醉南過蒼梧野陳祠有虞帝
回首九疑雲潸然為悲涕及承內遷命沉痾困炎厲
首丘竟落之褒贈中興惠唯餘孤墳在歲久盡頽廢
黃棘何榛之白楊亦翳之卓哉謝君子衰俗振高義
言諸兩郡守率衆共營置周垣龜甲齊脩表螭頭偉
銀榜倒薤題琰刻逸藻記庶幾永終古凱式于後世
虞嘉興名志道字彥高號雲陽薦發之子以茂異

晏起

春慵自與睡相宜况是新來病轉衰枕上不堪風雨
惡山中桃李正開時

題新治亭

聖祖神孫開宇宙興元永壽記潛飛金陵王氣千年
在王業偏安六代非臺下江流隨鳳去亭前松老化
龍歸道人無限圖中意獨抱遺髯對夕暉

焦御史

名昂字德元號栖霞元史遷常州府治中

開進士任御

書懷寄趙中丞子敬

大雅音聲久不聞東山纔起獨銷魂乾坤有道來威
鳳日月無私照覆盆堂上光陰思菽水鏡中勳業看

兒孫片帆高掛青雲表萬里風清待細論

焦黃巖

名昂字元舉昂之弟也仕至黃巖知州

至元四年夏旱禱而致雨

旱風驅雨忽盈池涼入燈窻暑氣微天上雲龍方帶
澤人間草木已增輝蟬聲帶曉投林咽燕羽翻晴掠
地飛客裏詩成添好况西城信有稻梁肥

司馬亨

世居邑之開化梅李相傳為溫公之裔

送薛仲傑之奉化州判

憶作參軍日曾聞少壯時蘭陵人共說茗水去猶思
甘雨歌來邑冬陽愛趙衰如何重綰綬嘆息未分麾

東海民從化南山判莫移朝廷須

表別擬送君詩

翟時中

名時中號直格老宋參政忠惠公汝文之八世孫

和張惟中秋夜有感韻

燭搖紅淚欲凝珠
惻惻悽悽客思孤
風起驛亭秋葉響
月沉江浦夜潮枯
謳歌安得遭堯禪
禮樂何時問魯儒
世事滿懷論不盡
坐深寒露下庭梧

范教授

名致大字德原號甘泉為孫膺薦為郡庠教授

挽虞志道

雅範存前輩斯文屬此翁
風流無謝傅耆舊失龐公
不復丘原起真成夢幻空
惟餘溪上月長照惠山中

題徐景元詩冊

政爾逃空谷疑音忽有聞
月中聽流水天際見行雲
要眇朱絃曲光明古錦文
淫哇方滿耳三嘆屬夫君
仲端彥倫德懋見過草堂一首

西風茅屋遠林秋多謝能來慰獨愁
在野何知城郭事間居幸接鳳麟遊
苦無書帙逢人借豈有琴樽為客留
相送石橋殘照裏暮蟬踈靄碧山稠

題麻監州墳

在邑之西郊

一日孤墳起翠微
空山草木亦生輝
賀蘭竟後靄雲死
杜季寧遲馬援歸
義魄不隨黃土化
英靈長共白

雲飛篤交卹幼端奇事慚愧梁溪一布衣

柏子庭 元僧善畫

題自寫菖蒲二首

盆泓淺映幽叢綠髮脩
隋鏡中瀟洒憑誰供拂
掠淡煙微雨及清風

雲骨溪毛瘦不禁井花濯
翠陰閒來坐對清詩
眼月落半牕風露深

鑑仲明 號湛然靜一若元僧
住惠山寺善畫

歸泉寺

憶別山泉歲月深暮雲秋草幾光陰
鬢髮盡換池邊

影少壯都移世上心舊徑林間無曲折前交座上總

消沉眼中惟有亭塔獨立東峯第一岑

奉謝張蛻庵承旨先生舊賜詩

潞國詩來秘監時青山入夢早思歸于今喜接期願
壽還憶江南舊釣磯

初夏卽事

三月已破四月初綠陰門巷晝模糊近牕一樹櫻桃
熟格磔鉤輅來鷓鴣

懷明善第

毘陵二月柳花天菘筍河豚已薦筵獨在錢塘江上

寺謾吟風雨對床眠

錫山遺響卷之二

錫山遺響卷之三

張尚書

名籌字惟中號一梧以書經魁江
浙鄉試洪武初歷官禮部尚書

次韻答內兄李伯器

作官猶着舊時袍
樗散庸凡托聖朝
枕上孤雲連日
夢鏡中白髮幾時消
每懷松菊荒三徑
便擬林泉掛一瓢
翻憶廿年前
舊事與君同醉竹西橋

潘仁仲容膝軒

南牕寄傲真容膝
絕勝淵明歸去來
竹逕晚風延客
坐杏花春雪滿園栽
金丹換得朱顏在
綠酒憑將笑
口開他日橘中尋
舊隱巴童相見莫須猜

劔石歌

干將飛空化為石石耶劔耶誰復識陽文蘊秀墨色
古陰縵積潤苔花碧卻疑女媧補天時手斷鰲足為
立極風霜剝蝕綠龜鱗鬼神撫護蒼龍脊東吳南越
事已矣何物君家乃有此好奇笑殺白猿公有道終
歸赤帝子日出遙瞻殺氣凝雨洗似聞妖血腥煨煉
不資爐鞴力胚胎自是陰陽精鳳山見之三太息至
寶恐為豪者得翩然作歌頌其德神物揮霍生顏色
我能為爾礪鋒鏘發爾幽潛使昭赫出掃妖邪扶正
直莫令良善相戕賊慎勿立此空庭側

題楊妃病齒圖

支頤忍痛蹙眉峰悶怯漁陽鞞鼓風若使九齡終相
位禍胎不在壽王宮

周東臯

名砥字履道號東臯與馬
孝常輩有荆南唱和集

荆南精舍圖

荆溪南向先生宅豈但看山醉綠苔任昉臺前垂釣
去孝侯祠下放船迴風花春亂千岩雪松瀑晴喧萬
壑雷回首舊遊渾夢裏煙塵西望獨徘徊

九日懷范德原德章昆仲

九日長吟思惘然南來誰泛菊花船青山滿郭無由

賞白髮經秋獨可憐，世事茫茫翻覆手。
人生來去來緣淒涼，一酌茱萸酒漫摘香。
紅憶去年

孝常西齋守歲讀王臨川除夜寄舍弟詩愛其
詞致清遠因用其韻各賦一首

殘雪半牕春意動，餘香一榻夜忘眠。
燈前對酒須今夕，客裏題詩尚舊年。
風竹蕭蕭還自語，寒梅的的竟誰憐。
知君賸有滄浪趣，待約秋風上釣船。

五月廿日雨中飲南樓

何許開樽散旅愁，疎簾水簾南樓天。
邊遠岫一黃鵠雨裏垂楊雙白鷗。
閒對故人思故國，不堪歸夢阻

歸舟東行未見煙塵靜，腸斷高堂鶴髮秋。

出西澗過龍岩途中瞻眺

適意窮山水覽物春時候，蘭薄迷煙孕桐林。
仰雲逗卻立駐幽躅前臨縱，遐觀谷鳴始嚶川響復溜。
衝飈激高竹晴曦艷，寒溜崖後翠羽戩石觸金鱗。
皴妙合理無遺心怡興難究，逼互緣石磴岩堯陟雲構。
豈唯廬霍期攬此高亭秀，素履非行險逸想仍冒詬。
遙此中情庶以謝紛揉。

經杜樊川水榭故基

落花風裏酒旗搖，水榭無人春寂寥。
何許長亭七十

五野鶯煙樹綠迢

戲和呈孝常

澗房松竹靜煙霏逕裏蒼苔行跡稀相與尋君遂初賦江花欲落換春衣

孝常移居南樓

高樓俯石瀨野亭連竹園中有林棲子逍遙味道言因山以崇德觀水欲知源非但相從屢願一寫喧煩

陶明德名植字明德元人精于春秋之學

賦尹氏澹飯齋

食澹神自清甘肥成痰疾吁嗟口腹徒嗜味無窮極

嘉饌必俟鯖駢羅方丈席過此三寸喉芬芳竟何益尹君和靖孫傳家守清白官雖列華要勵志常冰蘖簞食與豆羹泰然對賓客吾徒山澤癯何慙枯槁質書此澹飯齋洗心聊自飭

徐太守名績字伯宣號雪溪洪武初知武崗四任大郡所至以惠愛聞有文集

宿板橋鋪

板橋鋪外路三義古木疎篁映白沙行客往來多轍迹荒村寥落少人家樹頭黃老千林葉天際紅消一縷霞白髮衰翁年八十下畦自採木綿花

復任有懷

去歲朝天報政成，恩霑雨露復專城。京華耆舊推文翰，村落老翁知姓名。塵土半生蝴蝶夢，雲山三月子規聲。一琴一鶴重來郡，多少居民出郭迎。

王鎮江

名惟允，字俊民，號確軒，洪武初廬山官鎮江通判。太祖親製勅命嘉之，所著有確軒集。

自況一首時余得代將去官

未了公家事，空餘夢幻身。相逢青眼舊，共嘆白頭新。荊棘風塵地，桑麻雨露春。故山歸去近，何處是西神。

揚州懷古

華屋朱簾十萬家，春風吹散舊繁華。留連野色惟殘蝶，應答江聲有亂蛙。明月樓前沽美酒，蕃釐觀裏看

瓊花。我來謾憶曾遊處，立盡斜陽一嘆嗟。

洞庭洞

天接君山一髮青，平湖歲晚快揚舲。南風浪湧八千里，北斗光涵三四星。漁浦釣船煙雨暝，龍宮物恠水雲腥。中流矯首頻回顧，恐有飛仙度杳冥。

洞庭卽事

洞庭木落迥無波，十里征帆帶月過。白髮蒼顏淹仕路，青山綠水聽漁歌。水晶宮闕魚龍遠，葭茨汀洲鴈鷺多。進謁龍祠延晚眺，登樓聊復此婆娑。

題吳判簿梅隱所

使君先世住東吳種得梅花一萬株
鹽鼎功名同傳說詩壇步武接林逋
小橋流水春風在踈影餘香夜月孤
我亦江南看花者六年飛夢到西湖

送董文昭判簿進表

箋書遠奏九重天江水江花路八千
竹筍魚羹美加進飯浪花鷓首看行船
邦家有道官三傑天子無爲壽萬年
敷對從容清問及好陳忠悃玉堦前

登祖庭通明閣和馬長司韻

重樓閣勢聯翩此日登臨意欲仙
上界何曾足官府人間原自有壺天
紅分弱水三竿日青認齊州九

點煙便擬尋真遺世去一襟塵土政茫然

馬建昌

名治字孝常初爲僧洪武間官至建昌府同知有荆南倡和集

題夏圭畫牛

山蒼草萋江南水耕已罷犁牛閒得傍山之陸
樹涼草暖兒童嬉人徒見牛閒不知牛忙在一時東
家作伴西家種百畝連翻四蹄重麥飯無多牛易饑
尾短驅蟲祗搖動此圖相傳夏圭筆畫到秧疇農事
訖笛中若有太平謠更憶桃林初放日

次韻答楊孟載池臺晚望

獨坐面萍池微香泛碧漪意緣多病懶詩是苦吟遲

孤柳風難定叢篁雨不敬消閒此中趣未信髮如絲

雨後

芭蕉綠陰已滿地雨後山堂聞早蟬漁人自泊門前
柳野老來尋沙際田紛二攻劫故未已香二離別夢
相牽東湖白頭親健在此去音書須日傳

五月廿日雨中飲南樓

共愛風泉淙玉澗故人雖雨亦能來琴牀昨暮移高
閣茶竈經旬生綠苔性懶邊韶唯有睡憂深王祭自
多才酒酣競起思歸興世難飄零心欲摧

與華景彰遊惠山

華陂春水綠漪二二月西山雪後時舊宅重尋孝子
傳新年又赴故人期鶴鳴竹日當牕澹僧定茶煙出
閣遲我欲同修清淨業泉頭未記四賢祠

惠山留贈真長老

殿門高拱碧崔嵬慙愧名僧此日來辛苦欲興泉上
寺蕭條為掃劫殘灰九龍雲氣諸天繞萬象潭心一
鏡開洞酌便同甘露洒下方思見古風迴

春寒慰瓶中杏花

玉瓶春水曉猶添紅萼無言對捲簾莫為梅花翻自
恨梅老時節更清嚴

秋思東俞彥淵尚書

行人不歸兵未休
搖落山川生遠愁
誰效江南鼓吹曲
金陵歲晚憶曾遊

次韻任生雨中騎驟

長笑乘羸碧山裏
也勝立馬陳雲橫
虛名付與悠悠者
風雨荒岡獨自行

丁司訓

名信字彥誠號清樾生
洪武初為訓導邑庠

送李參政還吳

武畧雄才出隴西
牙旗玉帳駐梁溪
已知馬瑗能扶漢
孰謂樊侯久失齊
百物意榮春雨足
三台影落曉

天低淡煙芳草沙堤軟
一路東風萬馬嘶

程緝

邑梅里人

鑑仲明山林雪意圖

昔在越來湖上溪
雪晴東望曉淒迷
壯遊處、成陳跡
清夢時、覓舊題
竹嶼松巒分遠近
野橋村巷自東西
披圖彷彿登臨地
吳水吳山憶杖藜

王員外

名師道字敬德安節之子
洪武初仕至都官員外郎

寄孟叔敬宣撫

鄉里衣冠有幾人
故家復見孟參軍
高懷磊落先投老
壯歲飛騰已策勳
歸把長竿釣溪水
醉浮太白卧

山雲卜鄰便欲如王翰詩酒相從至夜分

華司訓

名晞顏字以愚號東湖老人善畫嘗任郡邑二庠訓導

寄彥清姪

聞道碧山栖隱君浮家泛宅未全貧香浮碧椀尊絲
滑雪落霜刀膾縷新靜俯龜巢風入袂醉扶花當月
留人不知多少閒詩卷了得吳淞客裏春

華栖碧

名幼武字彥清號栖碧所著有慮得集

春日偶成

船頭細雨濕漁簑船尾桃花漾碧波借問東君知得
否江南春色已無多

秋夜

澤國秋深夜氣涼飄零猶自未還鄉
蟋蟀泣露梧桐井絡縹緲風
薜荔牆只尺故園千里夢
亂離華髮十年忙
仲宣樓上長回首烽火連山欲斷腸

孟元帥

名棧字敬叔號圭一翁父宗鎮有文武才仕元至宣慰副元帥

題周南齋詩卷

南市城邊一草堂圖書左右百憂忘
屋偏宜夏風生畫花易逢春地向陽
不願笙歌聞北里為憐松竹鎖西莊
自家意思何相似庭草春來日漸長

錢子正

名義姪字子正吳越武肅王鏐之裔與弟子皆以文學名所著有華集

飲仲毅姪家

採菱溪上雨初收與客重來憶舊遊歲月不知人事
改湖山都是古今愁百年夢幻催華髮萬頃煙波愧
白鷗此日阮家賢叔姪竹林猶似晉風流

寄孟叔敬

故里停驂息駿奔清泉聊爲洗塵氛論文賴有通家
譜覲面慚無責沈文林下宰官今復見山中風月好
平分漢廷賢相開東閣未許心灰百不聞

挽孟季成同知

同是庚申愧不辰文場猶記策微勳青雲路穩將携

我白玉樓成已召君郎署典刑遺故老相門謀畫障
諸軍我來慟哭西州路撩亂空山日暮雲

贈張伯庭

隱士松間已化仙茯苓此日大於拳青年有子傳先
業白髮逢人說後天潦倒自知臨暮景行藏猶待卜
流年幾時去訪支機石擬向成都住一廛

二月六日苦寒

二月六日雲陰薄暮苦寒俄見侵迅雷未暇急掩
耳飛雪忽驚還滿林天神調戲竟莫曉桃李無言那
可禁豪家只作豐年賞誰有空街凍餒心

瓶中海棠

併插花枝不久長
暫時顏色暫時香
須知到了無根
祇莫怨東風不主張

絕句

湖海風塵入鬢毛
歸來燈火對兒曹
道人不是封侯
骨錯把黃金鑄寶刀

題牡丹手卷

令公宅裏千葉紫
天寶年中一捻紅
此景此花誰認
得試憑圖書問東風

題唐明皇擊梧桐畫

鳳翹微蹙半含羞
玉筋輕敲碧樹秋
分付梨園休進
樂大唐天子按梁州

錢子義名字子義

古別離

蓮心空有意
雨態本無情
蛛網簷前月
尋絲直到明

宮怨

夜永長門靜
愁多欲斷腸
開簾拜新月
歌吹在昭陽

春暮

幾聲啼鴉夕
易中萬紫千紅
過眼空吹得
春開又吹落
最無情意是春風

題畫

夕易淡。柳絲。遠浦長天欲暝時。腸斷楚山春雨後。鷓鴣啼向女郎祠。

柳枝詞

未放飛花點客袍。野鷺先占最長條。無端栽近章臺路。羞倚春風學舞腰。

朱仙鎮

金牌十二詔班師。九仞功成一匱虧。德壽殿深春日暖。不知沙漠兩宮悲。

厓山

蕭。西日慘無暉。寂歷空山海。四圍莫向洪波怨。國也勝行酒着青衣。

周知縣。名文孚。彥彬。號淨植。洪武初知任縣。

送王孝廉之官吳中

江左才華今復幾。東吳耆舊話夫君。書光夜燭青藜杖。墨暈春香白練裙。百里郎官新寵渥。九天列宿煥星文。勞君暫爾扶顛踣。行見徵書下五雲。

觀柳道傳太常留題惠山詩卷

五雲樓閣錦成堆。彷彿山光百里開。天上神龍行雨去。日邊驄馬踏花來。千年蘭若春餘夢。百世文章劫

後夾惟有石泉流不盡月明猶照鶴西飛

題一碧軒次范德章韻

軒下水天同一色眼中物色向誰論落霞散盡秋無際老鶴飛來雪有痕空洞玉壺盛沆瀣蒼涼碧月照黃昏他時若待吟風去雲夢微茫氣欲吞

送曹以忠之漳庠司訓

雪後郵亭柳半黃離筵餞子倒清觴山開錦綉蟠粵潮鼓鯤鯨送海航雅識龍門饒俊彥會趨天闕賦琳琅漳溪好謁朱夫子五馬行春舊有光

周觀復

名世忠字士衡號觀復生右正言士平之仲

冬日喜以忠曹文學見訪

寒几空堂坐隱書蕭條窗戶掩斜暉強顏同俗終難合用拙全生未覺非雪殘鳥跡庭前遍日落人煙野

次曹以忠見寄韻

書籤藥裹伴衰年寥落空齋隱几眠倦出柴荆非避俗靜依蒲褐似棲禪笑談不覺形骸間悟悅難因口語傳還憶聽松聯榻夜夢迴千澗落寒泉

陳教授

名伯雨字汝霖號休居士肖梅先生之後世孫元發源路儒學教授

哀陽山

空岩人去白雲
患九泉難洗
未收
景
人
事
異
梅
花
一
樹
亂
鄉
愁

心僧房梅花

別惜傷神月落參橫恐未真今日細看枝上
時曾寄隴頭人孤根占斷千蒼譜百詠空消萬
偶到禪房聊一和白頭憔悴不勝春

壬昆陵太守孫尚本

事業竟何爲千里仁風喜晏如
陽曾有獄中書忻傳召伯甘棠頌還念莊生酒

轍魚會看政成徵入輔野人檣散分樵漁

李雲泉

珠字伯器號雲泉生
西郡伯琳世孫

送僧還蔣山

鍾山萬劫盤蒼龍中有千古金仙宮
空御爐香靄隨天風上人祝髮歸禪宗
六通方今混一四海同省親飛錫梁溪東
惟楸松淒涼高秋霜露濃歸去來
兮勤修崇吾師慧性清且聰一輪秋月明
大道非難窮打開法界方成功

徐凝碧

名與老一名天麒字仲祥號凝碧由錢塘
居無錫與兄鑑仲明有雙清集

和王達善閒居感興韻

萬事休將知力求何如安分且優游
三杯濁酒自爲樂一首清詩足解憂
明月印江元有幻蒼松傲雪幾經秋
眼中看破興亡理深笑人生空白頭

過茶城感懷

荒城寂寂帶斜暉嘆息當年事已非
道上初聞白帝殞雲間俄見赤龍飛
范增志苦空遺恨韓信功多未見機
自古英雄誇智力不勝惆悵淚頻揮

題湛然兄所贈畫卷二首

亭石塔東峰上屈指光陰五十年
誰與空山清夜

話照公屋子近泉邊

松陰夾道鍾家彷彿泉聲煙樹邊
記得侍親童稚

日于今雙鬢已皤然

錢達可

名允字達可號關鐵叟居邑之錢喬

枯荷鵲鴿圖

霜落秋荷葉漸殘西風原上鵲鴿單
翻思煮豈燃其者能似沙禽念急難

林堂讀書

松雲蒼翠石泉清茆屋人家遠俗情
猿鶴未歸秋寂寂隔林時聽讀書聲

信道元

浙僧洪武初住
邑之南北二禪

劔石歌爲趙孟鴻作

海榴花邊古劔石突兀中庭人不識自從天地剖裂
時女媧煉此青銅碧夜深紫炁射南斗日出寒光通
北極我來愛此細摩挲雲生瀕耳苔封脊初疑夜宴
鴻門舞舞罷酒闌還置此龍爭虎戰知幾秋曾輔劉
郎作天子又疑佩之渡延平腰懸秋水寒波腥風雷
一夕便飛去恐爾卽是蒼蛟精古來神物世莫測誰
家所失君家得傳聞來自劔門關尚帶瞿塘三峽色
君家文彩動人世元非將種聲輝赫何當拂拭奉

明主勿斬忠臣斬奸賊南宮老人拜其側

卷之三

